

宋史

第十一冊

欽定四庫全書

宋史

PDG

宋史卷五十

天文志第三

天文三三十八舍上

二十八舍

東方角宿二星爲天關其間天門也其內天庭也故黃道經其中七曜之所行也左角爲天田爲理主刑其南爲太陽道右角爲將主兵其北爲太陰道蓋天之三門猶房之四表星明大吉王道大平賢者在朝動搖移徙王者行左角赤明獄平暗而微小王道失陶隱居曰左角天津右角天門中爲天關日食角宿王者惡之暈于角內有陰謀陰國用兵得地又主大赦月犯角大臣憂獄事法官憂黜又占憂在宮中月暈其分兵起右角右將災左亦然或曰主水色黃有大赦月暈三重入天門及兩角兵起將失利歲星犯

爲饑熒惑犯之國衰兵敗犯左角有赦右角兵起守之讒臣進政
事急居陽有喜填星犯角爲喪一曰兵起太白犯角群臣有異謀
辰星犯爲小兵守之大水客星犯兵起五穀傷守左角色赤爲旱
守右角大水彗星犯之色白爲兵赤所指破軍出角天下兵亂星
孛于角白爲兵赤軍敗入天市兵喪流星犯之外國使來入犯左
角兵起雲氣黃白入右角得地赤入左有兵入右戰勝黑白氣入
于右兵將敗

案漢永元銅儀以角爲十二度而唐開元游儀角二星十二度
舊經去極九十一度今測九十三度半距星正當赤道其黃道
在赤道南不經角中今測角在赤道南二度半黃道復經角中
卽與天象合景祐測驗角二星十二度距南星去極九十七度
在赤道外六度與乾象新書合今從新書爲正

南門二星在庫樓南天之外門也主守兵禁星明則遠方來貢暗則夷叛中有小星兵動客彗守之兵起

庫樓十星六大星庫也南四星樓也在角宿南一曰天庫兵車之府也旁十五星三三而聚者柱也中央四小星衡也芒角兵起星亾臣下逆動則將行實爲吉虛乃凶歲星犯之主兵熒惑犯之爲兵旱月入庫樓爲兵彗孛入兵饑客星入夷兵起流星入兵盡出赤雲氣入內外不安天庫生角有兵

平星二星在庫樓北角南主平天下法獄廷尉之象正則獄訟平月暈獄官憂熒惑犯之兵起有赦彗星犯政不行執法者黜

平道二星在角宿閒主平道之官武密曰天子八達之衢主轍軾明正吉動搖法駕有虞歲星守之天下治熒惑太白守爲亂客星守車駕出行流星守去賢用姦

天田二星在角北主畿內封域武密曰天子籍田也歲星守之穀稔熒惑守之爲旱太白守穀傷辰星守爲水災客星守旱蝗

天門二星在平星北武密云在左角南朝聘待客之所星明萬方歸化暗則外兵至月暈其外兵起熒惑入關梁不通守之失禮太白守有伏兵客星犯有謀上者

進賢一星在平道西主卿相舉逸材明則賢人用暗則邪臣進太陰歲星犯之大臣死熒惑犯爲喪賢人隱太白犯之賢者退歲星太白填星辰星合守之其占爲天子求賢黃白紫氣貫之草澤賢人出

周鼎三星在角宿上主流亾星明國安不見則運不昌動搖國將移乾象新書引邾鄆定鼎事以周衰秦無道鼎淪泗水其精上爲星李太異曰商巫咸星圖已有周鼎蓋在秦前數百年矣

案步天歌庫樓十星柱十五星衡四星平星平道天田天門各
二星進賢一星周鼎三星俱屬角宿而晉志以左角爲天田別
不載天田二星隋志有之平道進賢周鼎晉志皆屬太微垣庫
樓并衡星柱星南門天門平星皆在二十八宿之外唐武密及
景祐書乃與步天歌合

亢宿四星爲天子內朝總攝天下奏事聽訟理獄錄功一曰疏廟
主疾疫星明大輔忠民安動則多疾爲天子正坐爲天符秋分不
見則穀傷糴貴太陽犯之諸侯謀國君憂日暈其分大臣凶多雨
民饑疫月犯之君憂或大臣當之左爲水右爲兵月暈其分先起
兵者勝在冬大人憂歲星犯之有赦穀有成守之有兵人多病留
三十日以上有赦又曰犯則逆臣爲亂熒惑犯居陽爲喜陰爲憂
有芒角大人惡之守之人民憂多雨水又爲兵填星犯穀傷民凶

逆行女專政逆臣爲謀守之有兵太白犯之國凶民災逆行爲兵
亂有芒角貴臣戮守之有水旱災或爲喪辰星犯之爲水又爲大
兵守之米貴民疾歲旱盜起民相惡客星犯國不安色赤爲兵旱
黃爲土功青黑使者憂守之穀傷一云有赦令黑民流彗犯國災
出則有水兵疫臣叛白爲喪星孛犯國危爲水爲兵入則民流出
則其國饑流星入外國使來穀熟出爲天子遣使赦令出李淳風
曰流星入亢幸臣死雲氣犯之色蒼民疫白爲土功黑水赤兵一
云白民虐疾黃土功

右亢宿四星漢永元銅儀十度唐開元游儀九度舊去極八十
九度今九十一度半景祐測驗亢九度距南第二星去極九十
五度

大角一星在攝提間天王坐也又爲天棟正經紀也光明潤澤爲

吉青爲憂赤爲兵白爲喪黑爲疾色黃而靜民安動則人主好遊
月犯之大臣憂王者惡之月暈其分人主有服五星犯之臣謀主
有兵太白守之爲兵彗星出其分主更改或爲兵天子失仁則守
之孛星犯爲兵守之主憂客星犯守臣謀上出則人主受制流星
入王者惡之犯之邊兵起雲氣青主憂白爲喪黃氣出有喜

折威七星在亢南主斬殺斷軍獄月犯之天子憂五星犯將軍叛
彗孛犯邊將死雲氣犯蒼白兵亂赤臣叛主黃白爲和親出則有
赦黑氣入人主惡之

攝提六星左右各三直斗杓南主建時節伺機祥其星爲楯以夾
擁帝坐主九卿星明大三公忒主弱色溫不明天下安近大角近
咸有謀太陰入主受制月食其分主惡之熒惑太白守兵起天下
更主彗孛入主自將兵出主受制流星入有兵出有使者出犯之

公卿不安雲氣入赤爲兵九卿憂色黃喜黑大臣戮

陽門二星在庫樓東北主守隘塞禦外寇五星入五兵藏彗星守之什夷犯塞兵起赤雲氣入主用兵

頓頑二星在折威東南主考囚情狀察詐僞也星明無咎暗則刑濫彗星犯之貴人下獄

案步天歌大角一星折威七星左右攝提總六星頓頑陽門各二星俱屬角宿而晉志以大角攝提屬太微垣折威頓頑在二十八宿之外陽門則見於隋志而晉史不載武密書以攝提折威陽門皆屬角亢乾象新書以右攝提屬角左攝提屬亢餘與武密書同景祐測驗乃以大角攝提頓頑陽門皆屬於亢其說不同

氏宿四星爲天子舍室后妃之府休解之房前二星適也後二星

妾也又爲天根主疫後二星大則臣奉度主安小則臣失勢動則
徭役起日食其分卿相有讒諛一曰王者后妃惡之大臣憂日暈
女主恣一曰國有憂日下興師月食其宿大臣凶后妃惡之一曰
糴貴月暈大將凶人疫在冬爲水主危以赦解之月犯左右郎將
有誅一曰有兵盜犯右星主水掩之有陰謀將軍當之歲星犯有
赦或立后守之地動年豐逆行爲兵熒惑犯之臣僭上一云將軍
憂守有赦填星犯左右郎將有誅守之有赦色黃后喜或冊太子
留舍天下有兵齊明赦太白犯之郎將誅入其分疾疫或云犯之
拜將乘右星水災辰星犯貴臣暴憂守之爲水爲旱爲兵入守貴
人有獄乘左星天子自將客星犯牛馬貴色黃白爲喜有赦或曰
邊兵起後宮亂五十日不去有刺客彗星犯有大赦糴貴滅之大
疫入有小兵一云主不安孛星犯糴貴出則有赦入爲小兵或云

犯之臣千主流星犯祕閣官有事在冬夏爲水旱乙巳占後宮有喜色赤黑後宮不安雲氣入黃爲土功黑主水赤爲兵蒼白爲疾疫白後宮憂

案漢永元銅儀唐開元游儀氏宿十六度去極九十四度景祐測騎與乾象新書皆九十八度

天乳一星在氏東北當赤道中明則甘露降彗客入天雨

將軍一星騎將也在騎官東南總領車騎軍將部陳行列色動犯兵外行太白熒惑客星犯之大兵出天下亂

招搖一星在梗河北主北兵亡角變動則兵大行明則兵起若與棟星梗河北斗相直則北方當來受命中國又占動則近臣忤離次則庫兵發色青爲憂白爲君怒赤爲兵黑爲軍破黃則天下安彗星犯北邊兵動出其分夷兵大起孛犯蠻夷亂客星出蠻夷來

貢一云北地有兵喪流星出有兵雲氣犯色黃白相死赤爲內兵
亂色黃兵罷白大人憂

帝席三星在大角北主宴獻酬酢星明王公災暗天下安星亾大
人失位動搖主危彗犯主憂有亂兵客星犯主危

亢池六星在亢宿北亢舟也池水也主渡水往來送迎微細凶散
則天下不通移徙不居其度中則宗廟有怪五星犯之川溢客星
犯水蟲多死武密云主斷軍獄掌棄市殺戮與舊史異說

騎官二十七星在氐南天子虎賁也主宿衛星眾天下安稀則騎
士叛不見兵起五星犯爲兵客星守之將出有憂士卒發流星入
兵起色蒼白將死

梗河三星在帝席北天矛也一曰天鋒主北邊兵又主喪故其變
動應以兵喪星亾國有兵謀彗星犯之北兵散客星入兵出陰陽

不和一云北兵侵中國流星出爲兵赤雲氣犯兵敗蒼白將死
車騎三星在騎官南總車騎將主部陳行列變色動搖則兵行大
白熒惑客星犯之大兵出天下亂

陳車三星在氏南一云在騎官東北革車也太白熒惑守之主車
騎滿野內兵無禁

天輻二星在房西斜列主乘輿若周官巾車官也近尾天下有福
五星客彗犯之則輦轂有變一作天福

案步天歌已上諸星俱屬氐宿乾象新書以帝席屬角亢池屬
亢武密與步天歌合皆屬氐而以梗河屬亢占天錄又以陳車
屬於亢乾象新書屬氐餘皆與步天歌合

房宿四星爲明堂天子布政之官也亦四輔也下第一星上將也
次次將也次次相也上星上相也南二星君位北二星夫人位又

爲四表中爲天衢爲天關黃道之所經也南閒曰陽環其南曰太陽北閒曰陰環其北曰太陰七曜由乎天衢則天下和平由陽道則旱喪由陰道則水兵亦曰天駟爲天馬主車駕南星曰左驂次左服次右服次右驂亦曰天廐又主開閉爲畜藏之所房星明則王者明驂星大則兵起離則民流左驂服亾則東南方不可舉兵右亾則西北不可舉兵日食其分爲兵大臣專權日暈亦爲兵君臣失政女主憂月食其宿大臣憂又爲王者昏大臣專政月暈爲兵三宿主赦及五舍不出百日赦太陰犯陽道爲旱陰道爲雨中道歲稔又占上將誅當天門天駟穀熟歲星犯之更政令又爲兵爲饑民流守之大赦天下和平一云良馬出熒惑犯馬貴人主憂色青爲喪赤爲兵黑將相災白芑火災守之有赦令十日句己者臣叛填星犯之女主憂句己相有誅守之士功興一曰旱兵一曰

有赦令太白犯四邊合從守之爲土功出入霜雨不時辰星犯有
殃守之水災一云北兵起將軍爲亂客星犯歷陽道爲旱陰道爲
水國空民饑色白有攻戰入爲糴貴彗星犯國危人亂其分惡之
孛星犯有兵民饑國災流星犯之在春夏爲土功秋冬相憂入有
喪乙巳占出其分天子恤民下德令雲氣入赤黃吉如人形后有
子色赤宮亂蒼白氣出將相憂

案漢永元銅儀唐開元游儀房宿五度舊去極百八度今百十
度半景祐測驗房距南第二星去極百十五度在赤道外二十
三度乾象新書在赤道外二十四度

鍵閉一星在房東北主關籥明吉暗則宮門不禁月犯之大臣憂
火災歲星守之王不宐出填星占同太白犯將相憂熒惑犯主憂
彗星客星守之道路阻兵起一云兵滿野

鉤鈴二星在房北房之鈴鍵天之管籥王者至孝則明又曰明而近房天下同心房鉤鈴閒有星及疏拆則地動河清月犯之大人憂車駕行日食其分將軍死歲星守之爲饑去其宿三寸王失政近臣起亂熒惑守之有德令太白守喉舌憂填星守王失土彗星犯宮庭失業客星流星犯王有奔馬之敗

東咸西咸各四星東咸在心北西咸在房西北日月五星之道也爲房之戶以防淫泆也明則信吉東咸近鉤鈴有讒臣入西咸近上及動有知星者入月五星犯之有陰謀又爲女主失禮民饑熒惑犯之臣謀上與太白同犯兵起歲星填星犯之有陰謀流星犯后妃恣王有憂客星犯主失禮后妃恣

罰三星在東西咸正南主受金罰贖曲而斜列則刑罰不中彗星客星犯之國無政令憂多枉法

日一星在房宿南太陽之精主昭明令德明大則君有德令月犯之下謀上歲星守主得忠臣陰陽和四夷賓五穀豐太白熒惑犯之主有憂客星彗星犯之主失位

從官二星在房宿西南主疾病巫醫明大則巫者擅權彗孛犯之巫臣作亂雲氣犯黑爲巫臣戮黃則受爵

案步天歌以上諸星俱屬在房日一星晉隋志皆不載以它書考之雖在房宿南實入氐十二度半武密書及乾象新書惟以東咸屬心西咸屬房與步天歌不同餘皆脗合

心宿三星天王正位也中星曰明堂天子位爲大辰主天下之賞罰前星爲太子後星爲庶子星直則王失勢明大天下同心天下變動心星見祥搖動則兵離民流日食其分刑罰不中將相疑民饑兵喪日暈王者憂之月食其宿王者惡之三公憂下有喪月暈